



Komunikadu Imprensa

Munisípiu Dili

26 Fevereiru 2019

JSMP realiza treinamentu ba comunidade LGTB iha Munisípiu Dili

Iha 22 Fevereiru 2019, Judicial System Monitoring Program (JSMP), realiza treinamentu ba membru comunidade Lesbian, Gay, Transgender & Bisexual (LGBT) iha Munisípiu Dili. Partisipante sira mai hosi membru sira organizasaun comunidade LGBT hanesan CODIVA, Hatutan no Arco-Iris. Totál partisipante sira hamutuk ema na'in 24.

Tópiku ba treinamentu ne'e kona-ba "Demokrasia no Kna'ar Parlamentu Nasionál iha Prosesu halo lei no asesu ba justisa formál iha Timor-Leste no direitu ema LGBT sira-nian.

"Treinamentu ba comunidade LGBT nian nu'udar meu ida atu kapasita membru comunidade hirak ne'e no promove sira-nia koñesimentu kona-ba sira-nia direitu no devér atu bele partisipa ativu hanesan sidadaun sira seluk iha prosesu demokrátika nomós bele asesu ba justisa formál la ho diskriminasaun bazeia ba sira-nia orientasaun no espresaun seksuál", dehan Diretór Ezekutivu JSMP, Luis de Oliveira Sampaio.

Membru comunidade sira ne'e, naturalmente hetan diskriminasaun no marjinalizasaun no violénsia oioin iha sosiedade, até hosi sira-nia-membru família rasik, tanba ne'e importante atu bele promove sira-nia koñesimentu kona-ba sira-nia direitu hodi bele luta atu kombaté prátika diskriminativu sira iha comunidade nia let.

Durante treinamentu, membru comunidade LGBT sira entuziasmu tebes hodi rona materia hirak ne'ebé fasilitadór sira apresenta. Aleinde ne'e, sira mós ható'o sira-nia preokupasaun relasiona ho desenvolvimentu sistema demokrasia no lei sira iha Timor-Leste, partikularmente ho lei espesífiku sira ne'ebé bele rekoñese sira nia existénsia ligadu ho sira-nia orientasaun no espresaun seksuál ne'ebé seidak iha rekoñesimentu formál no legál bazeia ba interpretasaun Artigu 16 Konstituisaun RDTL ne'ebé koalia kona-ba Universalidade no Igualidade.

Hatan ba preokupasaun ne'e partisipante sira-nian relasiona ho Artigu 16 Konstituisaun RDTL ne'e, JSMP haktuir katak provizaun ne'e garante ema hothotu hanesan iha lei nia okos no iha direitu no devér ne'ebé hanesan nomós la iha diskriminasaun hasoru ema ida bazeia ba nia kór, rasa, estadu sivil, seksu, orijen étnika, nsst.

Kestaun kona-ba sira-nia direitu sira ligadu ho orientasaun no espresaun seksuál la hanesan, JSMP rekoñese katak ohin loron iha Timor-Leste seidak iha lei espesífiku atu hatan kona-ba situasaun ida ne'e, maibé JSMP fiar katak ho advokasia makaas no ekstensivu, iha loron ruma estadu sei haree asuntu LGBT ho sériu atu bele kria lei espesífiku ruma hodi trata asuntu ne'e. Iha realidade kumunidade LGBT tinan-tinan nia número sempre aumenta no ida ne'e sai hanesan dezafiu nomós razaun ba lejisladór no governante sira atu tetu sériu hodi bele trata asuntu ne'e ho sériu iha futuru.

Treinamentu ne'e ho objetivu atu hasa'e koñesimentu grupu LGTB kona-ba demokrasia, direitu umanu, knaar órgaun soberanu, partisipasaun públiku iha prosesu halo lei no asesu ba justisa formál no sira ninia direitu nu'udar sidadaun iha Estadu Direitu Demokrátiku ida iha Timor-Leste.

Atividade treinamentu ne'e, realiza tanba hetan apoiu finanseiru hosi Governu Austrália nia Embaxada iha Timor-Leste atraves hosi DFAT (*Department of Foreign Affairs and Trade*).

Atu hetan informasaun liután favor kontaktu direktamente:

Luis de Oliveira Sampaio
Diretór Ezekutivu JSMP
E-mail: luis@jsmp.tl